

春秋直解

春秋直解卷十三

郝敬習

哀公名蔣定公子在位二十七年

元年○春王正月公卽位

時甫四歲

楚子陳侯隨侯許男圍蔡

報入郢之怨也說者曰書圍蔡仲尼怨楚也夫春秋書圍多矣何獨此爲怨導吳者蔡人入郢毀宗廟徙陳器撻平王墓者非蔡人吳人也楚不能報吳而肆毒于寡小之蔡何爲怨之

春秋左傳卷之三
三
鼯鼠食郊牛改卜牛○夏四月辛巳郊殺郊牛下

書異且不時

秋齊侯衛侯伐晉

齊魯衛三國共伐晉救范氏也遂取棘瀘不書魯諱
也主少在喪權臣背舊好而助叛人非公命故不書
仲孫何忌帥師伐邾

二年○春王二月季孫斯叔孫州仇仲孫何忌帥師伐
邾取鄆郭東田及沂西田

邾之事魯何以不免三桓貪而自用兼其地而非公
有盟其君而公不知藐然三尺孤無異寄生仲尼所

以憂之

癸巳叔孫州仇仲孫何忌及邾子盟于句鈞繹

季孫不盟志未厭也明年遂復圍邾胡氏謂以所得田酬二氏救難之功可謂不惑季孫者

夏四月丙子衛侯元卒○滕子來朝

晉趙鞅帥師納衛世子蒯聵于戚

初蒯聵出奔靈公欲立公子郢子郢辭公卒夫人欲立之又辭乃立聵之子輒聵因晉趙鞅以兵入于戚秋八月甲戌晉趙鞅帥師及鄭罕達帥師戰于鐵公作鄭師敗績

齊人輸范中行粟于朝歌鄭人送之趙鞅禦之于戚
敗鄭師于鐵獲粟千車荀寅自朝歌奔邲鄆

冬十月葬衛靈公

十有一月蔡遷于州來蔡殺其大夫公子駟

蔡與蔡斗而背之從于吳子駟不可吳人襲蔡蔡懼
殺子駟以說而遷于吳州來

三年○春齊國夏衛石曼姑帥師圍戚

蒯聵入戚輒使石曼姑帥師圍之告于齊齊以師助
之君子曰輒非人子矣齊不爲人父乎其助人之子
以攻人之父也書先齊惡黨也公羊謂輒爲父命故

公羊者春秋之楊墨也

夏四月甲午地震

五月辛卯桓宮僖宮災

諸侯五廟耳魯自桓至哀十一公矣三家私其祖而不肯祧桓魯人頌僖而不肯祧僖魯之廟多于天子矣故因災誌之

季孫斯叔孫州仇帥師城啓

公作陽

境內震祖廟災非時之役不亦可已乎

宋樂髡帥師伐曹

討樂大心之亂也

秋七月丙子季孫斯卒

季桓子死無嗣其妻南孺子有娠以屬家臣正常曰男則告而立之女則肥也可南氏生男正常抱以告諸大夫于朝曰夫子有遺言康子使人殺男而殺殺男者正常奔衛

蔡人放其大夫公孫獵于吳

子駟之黨子駟非不忠于蔡者吳爲政也

冬十月癸卯秦伯卒

叔孫州仇仲孫何忌帥師圍邾

邾受盟矣而又圍之季孫所以不受盟也盟不書季

孫非季孫志也。伐書叔仲非二子得主也。春秋之義直而婉。

四年○春王二月庚戌盜殺

公穀作弑

蔡侯申

蔡昭侯違諸大夫議從于吳。吳人放殺諸大夫。公孫翩因昭侯之如吳也射殺之事隱。故書盜嗟乎一裘開釁身死國遷。儒者貴報怨竟何如矣。

蔡公孫辰出奔吳

盜黨也

葬秦惠公

宋人執小邾子

春秋直解

卷十三

四

哀四年

其故不可考書執惡宋也

夏蔡殺其大夫公孫姓生公孫霍

盜黨也

晉人執戎蠻公作子赤歸于楚

戎蠻叛楚楚圍之子赤奔晉楚軍于上雒以請晉人
執而歸之稱戎蠻夷之也

城西鄂

不時也

六月辛丑亳公作社災

社災社屋焚也禮國有殷社戒亡也亡國之社則屋

之

秋八月甲寅滕子結卒○冬十有二月葬蔡昭公○葬滕頃公

五年○春城毗

公作此

備晉也

夏齊侯伐宋

討其伐曹也

晉趙鞅帥師伐衛

討助范氏也先是衛與齊助范氏據邯鄲趙鞅圍降之荀寅士吉射奔鮮虞鮮虞人與齊納荀寅于柏人

晉圍柏人二子奔齊

秋九月癸酉齊侯杵

公作處

臼卒

齊景公夫人燕姬無子庶子六人公愛子荼立之以屬國夏高張五子皆出奔

冬叔還旋如齊○閏月葬齊景公

弔且會葬也

六年○春城邾瑕

公作貳

瑕邾邑魯人城之以逼邾

晉趙鞅帥師伐鮮虞

討其納范氏也

吳伐陳

初吳入楚召陳懷公辭元年吳侵陳未得志故再伐
楚子軍于陳父救之

夏齊國夏及高張來奔

齊陳乞謀廢立搆諸大夫於高國曰是將謀子又謂
諸大夫曰高國恃君謀二三子諸大夫信之與陳乞
鮑牧以甲入公室逐二子出奔魯

叔還會吳于祖

君子曰魯之事諸侯其猶陽鳥與燠則就之寒則去
之

春秋左傳卷之三
秋七月庚寅楚子軫卒

楚昭王經喪敗之後改紀其政孔子去魯司寇將往
焉陳蔡人阻之王興師迎之欲封以書社地七百里
子西不可昭王遂卒嗟夫天欲平治天下則子西之說
不行而昭王不蚤死矣儒者強謂春秋擯楚何居

齊陽生入于齊齊陳乞弑其君荼

公作舍

齊公子陽生荼之庶兄而景公庶子也陳乞立之廢
荼爲安孺子陽生欲殺孺子使朱毛私于乞乞僞爲
醉而泣毛遂弑孺子于野幕之下不書朱毛受之陽
生也不書陽生受之陳乞也陽生殺弟陳乞弑君從

弑君也。嗚乎。此一時也。衛輒兵父。陳乞弑君。陽生屠諸母。陳氏。莒齊三家據魯。六卿專晉。姦宄蠱賊聚于一時。詩云。莫赤匪狐。莫黑匪烏。仲尼當吾衰之年。手障狂瀾。春秋安得不作也。

冬。仲孫何忌帥師伐邾。

貪無厭也。

宋向巢帥師伐曹。

樂髡未逞志也。

七年。○春。宋皇瑗院帥師侵鄭。

爲晉侵也。

晉魏曼多帥師侵衛

衛從齊也

夏公會吳于鄆

穀作
鄆

吳子謀霸諸侯魯人先往吳徵百牢于魯如數供之
召季康子子貢辭免

秋公伐邾八月己酉入邾以邾子益來

季康子復欲伐邾諸大夫不可康子伐之入其公室
晝夜剽掠執邾子歸獻于亳社囚于負瑕嗟夫邾何
所獲罪肥何所奉討而若此其甚也卒使吳人克東
陽齊取二邑強臣階禍國受其殃故經書公伐尤魯

之無君也

宋人圍曹○冬鄭駟弘帥師救曹

八年○春王正月宋公入曹以曹伯陽歸

曹遂亡

吳伐我

邾人以魯難懇于吳吳爲伐魯盟于城下而遷故不稱鄙直也君子曰國自伐而後人伐之故書伐我

夏齊人取讎及闡

公作

○歸邾子益于邾

初齊五子之亂悼公奔魯季孫婁以妹卽位來逆季魴侯通焉不敢以歸齊侯怒稱邾來討季孫乃賂齊

春秋正義 卷三
以謹聞之地而歸邾子于邾

秋七月○冬十有二月癸亥杞伯過戈卒

齊人歸謹及聞

傳云齊侯逆季姬歸而遂嬖返魯謹聞君子曰非然也我歸邾子齊受賂無名是以求全貴于改圖也

九年○春王二月葬杞僖公

宋皇瑗帥師取鄭師于雍丘

鄭聲公嬖許瑕欲邑之取宋雍丘宋皇瑗敗鄭師盡俘以歸

夏楚人伐陳

陳卽吳也

秋宋公伐鄭

報雍丘之役

冬十月

十年○春王二月邾子益來奔

邾子反國無道吳人執而囚之至是來奔已又奔齊益齊出也

公會吳伐齊

初齊悼公以邾故召吳伐魯及邾子歸季姬嬖而齊魯平吳人怒更以魯伐齊君子曰昔晉之得志于東

方也。魯爲之。今吳得志于中國。又魯爲之。齊魯唇齒也。納遠讐而樹近敵。則不智。棄親戚而長寇讐。則不仁。哀公幼昏。強臣專恣。春秋所以尤于魯之無君也。故書公。

三月戊戌齊侯陽生卒

傳謂齊人殺陽生。以說于吳。嗟乎。陽生死已晚矣。子荼之立。父命也。而奪其國。旣得國矣。又使朱毛殺之。是弑君也。逐鬻姒。殺胡姬。是弑諸母也。先君之愛子。與愛姬。屠戮殆盡。是甘心于其父也。鮑牧立已。人言一慙。康之境外。是背德而攜大臣之心也。召吳人伐。

魯中道背之還以自伐是府國人之怨而借以報吳之名耳積惡滅身豈曰不宜然則何不書弑君齊人以卒赴也猶鄭髡頑楚郊敖疑則傳疑聖人之慎重也說者謂不忍以夷狄之民加中國之君迂闊之言也

夏宋人伐鄭

前未得志也

晉趙鞅帥師侵齊

乘齊難也

五月公至自伐齊

師于鄆聞齊侯卒吳子哭諸軍門外而潛師由海入齊人敗之還

葬齊悼公

衛公孟彊自齊歸于衛

蒯聵之黨也

薛伯夷

寅公作

卒○秋葬薛惠公

冬楚公子結帥師伐陳○吳救陳

陳卽吳也吳公子扎年九十餘帥師救陳少壯執節老耄伐國不亦可已乎楚書結吳不書扎爲賢者諱也世儒謂仲尼與吳夫吳與楚構救陳豈爲高誼

十有一年○春齊國書帥師伐我

報其以吳伐也君子曰齊未嘗負魯也邾子復則謹
聞歸矣與魯盟則吳人辭矣魯何爲又與吳伐之書
伐我齊直也故亦不書鄙

夏陳轅鞅頗出奔鄭

陳轅頗爲司徒賦田嫁公女而沒其餘國人逐之此
可爲簠簋不飭之戒

五月公會吳伐齊甲午齊國書帥師及吳戰于艾陵齊
師敗績獲齊國書

吳自艾陵之役衡行中國魯階之厲也是役也伍員

欲圖越諫伐齊不聽吳子予之劍自殺不書殺大夫
畧之也伍員傾險士皆宗國而噬其主如豺狼然其
謀吳僚也如鬼蜮然屬鏤之賜天之假手不足惜耳
秋七月辛酉滕子虞母卒○冬十有一月葬滕隱公
衛世叔齊出奔宋

衛世叔齊妻宋朝之女也而齊有妾嬖衛亂宋朝出
奔孔圉使齊出其妻妻以女齊私于前妾圉以女歸
齊淫于外圉使人奪其軒獻于公齊奔宋君子曰夫
婦人道之始春秋男女之際殆于禽獸比其敝也諸
侯而喪國大夫而喪家詩所以首二南也故夫詩亡

春秋作

十有二年○春用田賦

魯稅畝不足作丘甲丘甲又不足用田賦傳不舉其數而數可知夫國猶家也中人家始造必儉事簡費省產不多而用有餘至子孫奢侈不經之費浸廣計產數倍于昔而以狼戾暴殄日愛不足自然之數也通乎此義者可以經國制用長保其富矣

夏五月甲辰孟子卒

昭公之夫人陳司敗所稱吳孟子也昭公不得其死二子廢夫人薨而仲尼弔之季氏不纔不經無臣子

居喪禮故不書葬不稱夫人薨直也

公會吳于橐臯

尋鄫之盟是會也公不欲盟蓋畏齊而悔之顧無如
吳何使子貢辭免

秋公會衛侯宋皇瑗于鄆

云公作運

吳徵會于衛先是衛殺吳行人衛輒懼不敢往乞援
于魯宋而後行吳人果止輒魯使子貢說吳免之

宋向巢帥師伐鄭

初鄭取宋地築嵒戈錫三邑以居宋亡公子至是宋
伐取錫圍嵒鄭罕達帥師救之

冬十有二月螽

夏正十月也。仲尼謂季孫曰：火伏而後蟄者畢。今火猶西流，司曆過也。言司曆缺閏，是夏正九月耳。

十有三年○春鄭罕達帥師取宋師于嵒

鄭罕達救嵒敗宋師盡俘之墟其六邑

夏許男成公作卒

公會晉侯及吳子于黃池

是會也。吳與晉爭長。歆先吳說者謂書先晉夷吳非也。晉長于中國舊矣。吳楚雖強，不以遠間近。新聞舊禮也。夫敵血為足以明禮。春秋之有霸也，聖人未嘗

過而問焉。霸之有會。會之有盟。盟之有敵。血敵血之。有先後。聖人尤未嘗過而問焉。豈以此差貴賤定名實乎。

楚公子申帥師伐陳

乘吳有黃池之役也

於越入吳

夫差信句踐之成拒子胥之諫。進與諸侯爭長于黃池。越人乘其虛入之。遂滅吳。易曰。天道虧盈。盈楚自熊虔暴虐。乘疾淫昏。昭王之季。吳入郢。辱及廟墓。吳自柏舉得志。強梁衡行。越人一舉覆厥宗祀。履盈得禍。

若此其烈也。故春秋書入郢入吳先後一轍。吳亡而五霸盡矣。嗚呼！真萬世有國家者之龜鑑哉。

秋公至自會

是時三桓專魯。哀公幼昏。每書公尊君也。哀以前國有長君。每書臣誌專也。是故春秋有義無例。

晉魏曼多帥師侵衛

公魏下無曼字

討助荀范也

葬許元公。○九月螽。○冬十有一月有星孛。佩于東方。

○盜殺陳夏區

既公作區

陳大夫也。傳不詳其事。

十有二月螽

十有四年○春西狩獲麟

春秋以魯事終何也魯史也以魯事始故亦以魯事終終哀公何也魯至哀而公室小於三家不可以國矣春秋爲五霸作五霸始隱至哀而齊微晉分吳亡五霸終矣上下十二公二百四十有二年天行窮于十二君取十二週矣年取二百四十再週矣以法天也其終于哀十四年春何也是時齊陳恆弑君夫子年已七十有一沐浴請討三家不可而公不能令慮陳恆之事將及魯而傷周公之後之不復振故慷慨

絕筆終焉已矣。其終于獲麟何也。春秋感獲麟而作也。昔者商紂之末。麟趾兆而文王興。今周衰麟至。文王沒矣。文不在茲乎。王者不作。二百餘年。天下芒砀紛拏。干戈相尋。無寧日。不祥之人。與不祥之事。生民以來。未有者。二百年間。備矣。子弑父。臣弑君。弟謀兄。妻逆夫。夷猾夏。殺人父兄。毀人宗廟。僊人子女。滅人國家。人情之兇毒極矣。天子降而事諸侯。諸侯降而事大夫。大夫降而事家臣。支大于本。尾豐于腰。四分五裂。世道之疢危極矣。而又捐廉恥。壞大防。裂衣裳。爲毛羽。貶人類。爲鳥獸。倡優下賤。羞爲之事。王公薦

紳冒昧嘗試而不恥與人善易室而處與人不善殺
之而分其室君淫臣婦于其家卿大夫要寮友之妻
于路縱夫人宣淫于境外率將士班處于人宮甚者
如衛子頑之妻其母宋襄姬之通其孫齊諸兒之淫
女弟楚熊比之奪子婦名教掃地秉彝凋喪三五流
風餘脉蕩然無復纖絲之維繫矣嗟乎天道沍寒而
啓陽和長夜昏漫而生朝曦豈其鵲鳴于灌莽
狐狸長嗥于通園而無嘉祥之來復乎或曰七國之
禍慘于春秋夫七國之禍春秋之餘孽耳有五霸自
有七王濫觴于春秋而滔天于七國是故兵莫慘于

人心莫邪爲下邪說之害甚于洪水人心之惡毒于
猛獸迨乎漢唐以後春秋之教行六經炳焉同風迄
于今家誦戶說雖田夫紅女所養下隸莫不知仁義
爲美而名節凜然寧以身膏鰲斧蹈湯鑊不敢輕以
身爲蠻髦狗彘學士大夫彈冠振衣立于天日清明
之下貴以身爲聖賢敦詩書悅禮樂無復有輕視檢
押敗壞廉節如春秋世者則誰之功人情貴耳賤目
耳聞三五藐爲不可及目覩清時則薄爲叔季顧漢
唐以來士林之清議與英君哲后之崇獎人懷姱節
揚芬來許雖三五何以加焉當其治世化行無遜詩

書所稱比其亂也。名義相扶，不至如春秋之腐敗。嗟夫！是誰之功？三五帝王不能使其後無春秋，而仲尼能使千萬世不復爲春秋。三五帝王不能以其道行于死後，而仲尼能使其道明于萬世。故曰：生民以來，未有夫子。春秋成而禎祥至，禎祥出而春秋終。大人者，與天地合其德，非人之所能爲也。後世乃有續獲麟而再作者，愚以爲春秋不可再作矣。夫春秋非未就之緒也，寓其志則不必具其事，裁其義則不必舉其全，志苟明矣，義苟備矣。十二公足矣，今欲補少于定哀之後，亦宜增多于桓隱之前。豈蛇續貂爲贅而

已矣。春秋之義不言而信，無毀譽而直。今人爲一說，家持一端，可否同異，尚未通曉，而徒勦襲聖人之辭，學步效顰，爲訛而已矣。仲尼謂文勝則史，故春秋之辭尚體要，立經不立傳，國史在，使人自考，而是非可知。今自爲綱，自爲目，吾說我志，心口相證，爲私而已矣。聖人持世，不過五百。西周以前，有文武周公在東，周以後，自謂竊取，蓋澤過五世，遠不相及。春秋二百四十二年，以爲多矣。今欲盡取秦漢以來千餘年是非，包舉獨任，挾山超海，爲狂而已矣。春秋明王不作，而寓義斯文，良非得已。漢唐宋之興也，真主輩出，大

業無遜湯武。謂一切無明王。以比于五霸十二國之
閏數。玉石俱焚。爲溷而已矣。春秋起隱公。下迄獲麟。
十二公世未遠也。仲尼猶慮見聞失真。斷自隱始。而
且闕其疑。今悉憑簡策。闖然直決千餘年以上事。信
爲得情。捉風捕影。爲誣而已矣。春秋雖寓是非。而寬
厚微婉。直而不倨。正而有體。後世妄起凡例。褒貶黜
陟。恣口舌。行胸臆。不顧君父之醜。曖昧之疑。譙讓詆
訶。無異怒罵。爲亂而已矣。六經名教之規矩。規矩一
而方圓不可勝用。非盡方圓之器。爲規矩也。今欲毛
舉千百世亂臣賊子。奸雄隱慝。都爲一部。蘇洵氏所

謂雷霆轟轟然曰下求不孝子擊之爲棄而已矣若
使春秋爲殘緒不可不續昔者孟軻雄辯願學孔子
卽宜輟七篇而爲此漢唐以來非乏博雅寥然中斷
者千五百年士縮手結舌待考亭氏出而後了此是
伯牙絃絕子期再生爲巧而已矣夫抱聖人之道者
不遇聖人之窮遭聖人之窮者不求聖人之志有聖
人之志者無聖人之才有聖人之才者無聖人之識
有聖人之才識者無聖人碩德重望卓然爲千萬世
師不敢作春秋故夫楊雄太玄擬易法言擬論語王通續六
經朱元晦綱目續春秋之數子者日月出而燭火然

爲僭而已矣

春秋直解卷十三終

春秋直解卷十四

非左序

春秋本事自當依左。舍左如夜行。茫不知所之矣。公穀尚例。無左例無稽。左言事而例始有。據左言例而人始爭爲例耳。故左諸傳之嚆矢也。其材富而辭艷。弔詭而好奇。世人喜之以爲羽翼聖經。其實風影滅裂。去道離經。遠惟假託。立明人莫敢指。遇紕漏寧呵護。揜飾不知其爲僞筆耳。左傳誠出立明手親炙先聖同心之言。隻字不可易。隻字可易。卽非立明而況踳駁舛謬。不可勝數。豈親承尼父見而知之者乎。漢司

馬遷首相推信馬季長鄭康成杜元凱輩唯然和之
末學承訛至以周易文言爲魯穆姜語毛詩古序爲
附會左傳作臧宣叔媚晉卿權辭引爲王制論夏父
弗忌逆祀諸侯祖天子謂都家皆有祖王廟晉人得
罪周室極力崇獎使三王罪人貌千古榮名此類背
理傷道何可言俗人耳食難與口舌爭今畧舉其謬
已三百三十餘條輒附管見題曰非左或曰非左不
非公穀何居曰公穀則誠公穀左實非立明也知左
之非立明者與言春秋幾矣

皇明萬曆庚戌六月朔日京山郝敬自序

春秋非左卷上

郝敬習

隱公

凡二十條

元年夏四月費伯帥師城郎不書傳曰非公命非也凡內城書重守也其不書舊史畧也如謂非公命不書魯事非公命者多矣晚年三桓爲政非公命者什九皆不書邪

秋七月天王使宰咺來歸惠公仲子之賵傳曰豫凶事非也以天子而下賵諸侯之妾失禮之大者區區論豫凶事猶舍放飯而問齒決也

冬十月改葬惠公。公弗臨。故不書。非也。改葬非禮。古者不脩墓。況改葬乎。故不書。非以公不臨也。謂公弗臨者。以公攝政。不主喪也。旣不主喪。又誰主改。然則謂公不臨。亦非也。又曰。太子少葬。有闕。是以改葬。夫惠公葬甫逾年耳。太子豈遽長乎。亦非也。又曰。衛侯來會葬。不見公。亦不書。豈有攝國政。舉大事。賓至不會者。尤非也。此爲隱將讓桓附會之耳。

邾人私於公子豫。請師助鄭伐衛。盟于翼。非公命。不書。非也。已盟而終不果助。故不書。新作南門。非公命。不書。亦非也。豈有國門新作。公不知者。凡役非禮失時。

則書常事不書

公子益師卒傳曰公不與小斂則不書日非也不書日史闕也其書日史詳也大抵入春秋初世遠事多闕襄昭以後世近史詳經據史耳漢司馬遷作三代世表曰疑則傳疑蓋其慎也本此

二年紀子伯莒子盟于密伯上當有關文傳蒙上文紀裂繻來逆女以繻訓帛改伯從帛謂裂繻字子帛夫裂繻紀大夫終春秋未有書大夫先諸侯者豈以裂繻先莒子乎非也

三年鄭莊公爲平王卿士怨王之貳於虢也質王子又

取周之禾麥其狂悖無禮已甚而傳且曰信不在質非也雖信在質烏乎可又曰周鄭交質周鄭交惡夫周鄭無等豈春秋立言之法

宋宣公卒舍子與夷立弟穆公穆公卒亦舍子馮立與夷是爲殤公子馮奔鄭殤公與鄭構兵十年至于身死國危此小讓之害義非春秋所予也而傳曰宣公命以義烏在其爲義也又曰其子饗之烏在其能饗之也

晉曲沃莊伯伐翼王命虢公伐曲沃立哀侯六年翼人立鄂侯皆不書史畧也經未嘗以爲霸國加詳而傳

特爲補苴鋪張唯恐失之其奉晉也如雷霆鬼神屈
天子諸侯事之大旨謬矣故愚疑是書三晉辭人作
耳

六年鄭伯侵陳大獲先是鄭伯請成于陳陳侯不許陳
五父諫不聽傳謂陳侯長惡不悛遂自及也夫不與
鄭平非惡也不聽賊子計非不悛也陳侯見弑非以
不平鄭也傳欲附會陳桓公被弑爲偏曲之論耳

京師來告饑不書公爲請糴于宋衛齊鄭傳以爲禮非
也天子告饑于諸侯諸侯爲天子請糴于鄰國卑矣
諱故不書以爲禮是何禮與

七年滕侯卒傳曰不書名未同盟非也按宣公九年成
十六年及此三書滕子卒皆不名年遠史闕也昭公
以後四書滕子卒皆名近故詳也盟春秋所賤也豈
以同不同爲例未同盟而卒名者如桓十年曹伯終
生卒十一年衛侯晉卒之類昭以後尤多考之非盡
同盟也

陳五父如鄭泣盟軟如忘洩伯謂必不免此因五父將
弑君見殺附會之傳凡人死必爲非讖緯之陋習也
八年秋七月庚午宋公齊侯衛侯盟于瓦屋傳稱鄭伯
以齊人朝王爲有禮非也夫諸侯不朝霸者以之朝

又不以諸侯朝以其人入見不敬莫大乎是何禮之有

九年冬北戎侵鄭鄭伯大敗戎師不書傳不言所以如以不告不書爲例經書侵伐多矣未必皆因告如以告鄭莊首霸有四夷功無不告者矣

十年夏鄭與魯伐宋取防鄆二邑與魯傳曰鄭莊公可謂正矣以王命討不庭不貪其土非也夫鄭之伐宋假王命報私怨非真王命也牽帥魯人助已取地酬之非真不貪也凡春秋之義黜霸而傳皆譽霸也

齊人鄭人入郕傳曰討違王命非也鄭以私怨伐宋郕

不助鄭非不共王命也霸者之口實可以解經乎

十一年秋七月壬午公及齊侯鄭伯入許傳稱鄭莊公使大夫百里奉許叔居許東偏爲有禮非也無故而分人之國逐人君出君弟于其鄙又使私人監之何禮之有

周桓王以蘇忿生十二邑之田易鄭四邑傳曰已不能有而以與人人之不至不亦宜乎此言非所論於天子也詩云普天之下莫非王土周室雖衰春秋之義不衰王室何爲其不能有乎

傳曰鄭伯以虢師伐宋大敗宋師宋不告故不書凡諸

侯有命告則書不告則否未知此爲仲尼之例乎其
舊史之例乎如仲尼之例隱桓遠矣告不告仲尼不
知也如舊史之例傳何以冒爲舊史也傳非舊史又
非爲舊史作傳何爲守舊史之例守舊史之例又焉
用仲尼爲也然則如何曰魯史書不書或因告不告
仲尼書不書實非因魯史告不告也史不告不書者
傳詳之故知傳非舊史世儒誤也

桓公

凡十九條

傳二年晉曲沃武公伐翼不書不言其義

三年公會齊侯于贏傳曰桓公與文姜成昏于齊非也

此因文姜不淑臆度而甚之經書公子翬如齊逆女稱女未成婦也

齊侯衛侯胥命于蒲傳曰不盟而不詳其事芒昧若此何以爲立明此類甚多

四年春正月公狩于郎傳稱書時有禮非也春秋聖人傷時失禮而作以時以禮則不書狩于郎譏遠也

五年春正月甲戌巳丑陳侯鮑卒傳曰再赴非也是時陳佗弑太子春秋于弑逆未有不書者甲戌下有闕文當云陳佗殺世子免巳丑陳侯鮑卒傳謂爲再赴一人之死焉有兩期紕漏若此而託之立明千餘年

人不察可哂也

天王使仍叔之子來聘傳曰書弱非也弱何足書蓋卿大夫子弟未爵而奉使者世官非古因事以表義耳六年北戎伐齊齊乞師于鄭鄭太子忽帥師救齊大敗戎師不書傳不言其故以不告爲例非也是役也諸大夫皆在魯爲齊饋餼後鄭來戰于郎何待告蓋鄭莊始霸好戰亟功隱九年突敗戎今年忽又敗戎二子恃功爭國禍及累世故不書不齒其功也

七年夏穀伯綏來朝鄧侯吾離來朝傳曰書名賤之非也穀鄧近楚小國東距魯千里來朝非無事而傳不

知公穀謂爲失國之君似也。禮不臣寄公。何爲賤之。然則書名何也。凡魯事多僭。小國諸侯來。史書名。書朝尊內也。經因之直也。所以謂之吾誰毀譽也。傳不達。

冬曲沃伯誘晉小子侯殺之。此大事不書。史闕傳不言其故。

八年春正月己卯烝。夏五月丁丑又烝。皆無傳。按五月夏正三月也。四時之祭。冬烝夏禴。禴簡烝備物。夏用冬祭。失禮故書。此烏可無傳。

楚武王伐隨。傳載其事甚詳。是時楚始稱王。經不書。傳

亦不及經以告不告爲例傳豈亦以告不告爲例乎
經之不備也以史史之不備也以不告傳又不及安
在其爲輔經乎

十年王師伐虢爲虢大夫詹父伐其君也不書傳不言
其義

四年秦人執芮伯十年納芮伯經皆不書其皆以不告
邪大抵秦楚晉遠隱桓間又遠故事多闕齊衛宋鄭
諸國近記聞較詳耳

十一年楚屈瑕盟貳軫敗郢人于蒲騷不書十二年瑕
又伐絞爲城下之盟十三年伐羅兵敗自縊死俱不

書傳皆不言其義按此類事非要故不書卽傳亦可以無贅矣而他事經書者傳反缺詳畧往往失中

十四年秋八月壬申御廩災乙亥嘗傳曰書不害非也夫御廩藉田所供粢盛之藏災矣猶謂不害乎不害則何書周八月夏六月也嘗不時也燼餘之粟以供粢盛不敬也

十六年冬城向傳曰書時非也凡城書重守也大都耦國亂之本也

十七年十月朔日有食之傳曰不書日官失之非也史闕耳官雖誤何遂不日事不日多矣豈盡官失邪

鄭高渠彌弑昭公忽此大事不書傳不言其義按傳稱忽爲世子救齊有功辭昏有禮惡高渠彌有智若是則賢世子哉而詩存狡童褰裳擇兮有女同車皆刺之春秋于見逐不書世子已立不書鄭伯被弑不書弑君大似不滿焉則傳言未盡信耳

齊襄公執鄭高渠彌輟之不書弑君無書故殺賊亦不書蓋世遠史闕而傳影響湊合故鄭事始終可疑若使丘明作傳豈茫昧如此

莊公

凡三十三條

元年不書卽位傳曰文姜出非也父死于外嗣君在喪

不朝正卽位則不書傳因前年書公之喪至疑姜畱齊今年三月夫人孫于齊是姜已歸而再往也前後八往往書歸皆不書歸常也傳不達

三月夫人孫于齊傳曰不稱姜氏絕不爲親非也春秋無此等隱僻之例禍先公而孫齊者有二夫人乎故氏可省也前書公與夫人姜氏如齊此蒙前之文耳秋築王姬之館于外傳以爲知禮非也莊公有親喪而主齊昏王不當命魯亦不當受命父母之讐不枕戈而反爲讐人役曾是爲知禮乎

傳四年楚武王伐隨將齊入告夫人鄧曼曰余心蕩鄧

曼曰王祿盡矣行遂卒于櫛明木之下夫齋而能不蕩者其唯心齋者乎且何以知王祿之必盡也傳之迂誕多此類

五年秋鄭犁來來朝傳曰稱名未王命非也按鄭海濱附庸之國犁來其君名小國諸侯來稱朝稱名史尊內也非以無爵無爵何以朝且春秋諸侯有爵誰其有王命者乎不獨一鄭犁來耳

六年王人子突救衛傳曰君子以二公子之立黔牟爲不度非也按王師救黔牟而齊魯宋陳蔡五國之師共逐黔牟立朔殺公子洩公子職是王師挫衄于五

國而力誠于救衛也。書王人子突救衛，不言敗，諱之也。傳釋此不講，而罪二公子之不度，豈不悖與？

七年夏四月辛卯，夜，恆星不見，夜中，星隕如雨。傳曰：恆星不見，夜明也。星隕如雨，與雨偕也。非也。常謂之恆，常見之星，忽不見，而星隕落如雨，書異也。

秋，無麥苗。傳曰：無麥苗，不害嘉穀，非也。周之秋，夏之五月也。大水爲災，麥傷，又無五穀之苗。今云不害嘉穀，是以苗卽麥也。五月而麥尚爲苗乎？二十八年冬，書大無麥禾，豈禾亦麥乎？蓋無麥有苗，無苗有麥，非大苗麥苗俱無，饑甚，故書而傳之，紕漏甚矣。

八年正月甲午治兵傳曰治于廟非也師次于郎治兵
卽于郎耳謂爲禮尤非也治兵將與齊伐郕黨仇人
伐同姓雖治于廟又豈禮乎

夏師及齊師圍郕郕降于齊師傳曰君子是以善魯莊
公非也按是時慶父與齊爭功欲伐之公辭以脩德
故傳稱善抑不思黨讐人伐兄弟不善之大者懼不
敢爭而詭云脩德何爲善之

十一年公敗宋師于郕茲傳曰凡師敵未陳曰敗某師
非也經書敗多矣豈敵皆未陳者邪又曰皆陳曰戰
大崩曰敗績得傳曰克覆而敗之曰取某師京師敗

曰王師敗績于某凡此類文義隨宜豈可局以爲例
秋宋大水魯使往弔宋人對曰孤實不敬天降之災又
以爲君憂拜命之辱此對行人常語臧文仲何遽以
湯武比之聞其爲公子御說之辭曰宜爲君于義何
取此因宋將立御說附會之

十二年秋八月甲午宋萬弑其君捷按傳萬奔陳宋人
請而醢之春秋于弑君之賊見殺如州吁陳佗類無
不書者殺人而醢非祥刑昔者商紂用之文王歎息
衛蒯賁用之孔子盡覆其家醢刑之不祥不可以訓
傳不達

十四年鄭厲公突自櫟歷侵鄭傳瑕弒子儀而納突不書傳不言其故鄭事始終未見了然

鄭南門外蛇與內蛇鬪內蛇死六年而厲公入此委巷之譚後世識緯符命之作備也

十六年僖王使虢公命晉曲沃伯以一軍爲諸侯不書蓋曲沃篡晉而王命獎亂故諱不書齊桓晉文受命爲侯伯亦不書卽此意春秋黜奸權而薄榮寵志在撥亂耳一切以不告爲例鶻突甚矣

十八年公追戎于濟西傳曰不言來諱之非也書追則其來可知何諱之有

十九年楚鬻拳諫楚文王不聽臨之以兵懼而從之拳
遂自刎傳謂鬻拳愛君非也夫人臣事君盡禮不可
則止何得廼爾

夫人姜氏如莒明年又如莒莒非父母之邦再如必有
故無傳

二十年周五大夫以王子頹作亂鄭厲公以惠王歸處
于櫟二十一年厲公與虢公納王殺子頹及五大夫
王錫鄭地虎牢以東皆不書傳不言其故豈盡以不
告邪

傳稱王子頹之篡立也以樂享五大夫鄭突聞之知其

將死惠王反國亦以樂享鄭伯原伯見之知鄭伯將死何奇中哉附會之說也

二十二年陳人殺其公子御寇傳謂殺太子非也御寇非太子也若晉殺世子申生宋殺世子痤則直書世子矣是時公子完奔齊是爲田齊之祖顧經義不在陳完奔齊而在宣公殺子傳置殺子不言侈譚陳完辭爵與懿氏之卜周史之筮緣飾繇辭以神其占皆術士之說耳

是年夏五月不書事無傳按經無事紀時必首孟月五月下必有闕文傳不知

七月丙申。及齊高侯盟于防。必有故。傳不知。

三十有三年。公及齊侯遇于穀。十二月甲寅。公會齊侯。盟于扈。俱無傳。竟不知何事。

二十五年。春。陳侯使汝叔來聘。傳曰。嘉之。故不名。非也。春秋大夫。不名。多矣。名者亦多矣。豈名者皆賤之。而不名者皆嘉之。此類無大義。因舊史。非例也。

二十六年。春。公伐戎。夏。曹殺其大夫。秋。公會宋人。齊人。伐徐。俱無傳。顧汲汲譚晉事不休。知有霸而已矣。二十七年。王使召伯。廖。賜齊桓公命。爲侯伯。不書。如以不告爲例。桓公之始爲侯伯也。豈有不告者哉。不書。

是不齒其爲侯伯也。不齒其爲侯伯，而傳汲汲尊尊，非也。

二十九年春，新延廡。傳曰：新作，非也。公羊謂爲脩舊是也。凡創造曰作，脩舊曰新。改作曰新作。成公三年，新宮災，謂脩飾舊廟，祔新王耳。魯廟多矣，故不創亦不必改。定公二年，新作雉門，兩觀毀于火，改作也。僖公二年，新作南門，亦謂改作。新延廡，不書作，故公羊說是也。孰謂立明不如公羊乎？

冬，城諸及防。傳曰：書時，非也。是年秋有蜚，去羊大無麥禾，告糴于齊國，非其國矣。而築郿城諸，城防焉，得時。

三十二年春城小穀傳曰爲管仲非也魯自城耳經惟內事不稱國傳誤于管仲邑穀而不知穀與小穀異穀齊小穀魯也時桓公方厚施諸侯豈勞諸侯城齊管子亦必不以私邑役諸侯人可知也

夏宋公齊侯遇于梁丘傳曰宋公請先見齊侯非也梁丘去齊八百里齊桓遠來非宋往見之蓋齊之霸宋與有力焉諸侯從齊宋爲先齊盟江黃宋預謀故二國最親梁丘之遇桓有諮于宋故書先宋豈宋公請見而桓反暱就之乎

二十五年六月朔日有食之鼓用牲于社秋大水鼓用

牲于社于門世俗以日食爲陰蝕陽社陰主故求于陰土制水秋祀門故求于社與門皆委巷之禮而傳曰天災有幣無牲非日月之眚不鼓是何禮與雲漢之詩曰靡愛斯牲非天災與十月之雅非日食與脩省而已不聞鼓也

是年秋有神降于虢之莘虢公享之神賜虢公土田周史過虢史嚚皆知虢將亡此因晉將滅虢附會之

閔公

凡三條

元年傳曰不書卽位亂故非也禮新君踰年而改元朝正于廟卽位于朝始成爲君時閔公甫八歲內亂不

行卽位故史無書如傳言則是公卽位而經以繼弑
君不請命削之耳夫位大寶也體元正始君父之大
事也仲尼輒以胸臆舞文詭稱貶削豈垂世之訓與
季子來歸傳曰嘉之非也仲尼未嘗曰我書字則嘉之
皆世儒臆說耳魯季氏之始何嘉之有

晉獻公滅魏以賜畢萬卜偃謂萬爲盈數魏爲大名占
其後必大此市兒觀枚拆字語因魏後爲七國附會
之故愚疑傳戰國時晉人作耳

僖公

凡四十條

元年春傳曰不稱卽位公出非也國君踰年改元往年

八月成季以公適邾慶父奔莒成季以公入立之冬
齊高子來盟公入久矣何謂公出又曰公出復入諱
國惡不書亦非也哀姜慶父之惡不諱公出復入何
諱乎然則何以不書不朝正卽位史無書也

夏六月邢遷于夷儀齊師宋師曹師城邢傳曰侯伯救
患分災討罪非也方狄師困邢桓公以諸侯之師觀
望不進安在其爲救患也邢滅未聞齊以一旅問狄
何爲討罪邢人奔師乃以之遷因敗爲功霸者好名
之事不書救邢而書次于聶北誌慢也其遷也書邢
遷其城也書諸侯不與齊功也昭公十三年楚子復

陳蔡亦書蔡侯歸蔡陳侯歸陳不言楚復義正同春秋貴至公不錄私惠後儒言春秋諛五霸皆自傳始也

八月公會齊侯宋公鄭伯邾人于櫟種傳曰謀救鄭非也七月楚伐鄭八月鄭伯在會楚師退久矣何救之有蓋謀報楚耳

冬十月壬午公子友帥師敗莒師于鄆歷獲莒挐女平聲傳曰嘉獲之非也季友獲莒挐公賜之費及汶陽田季氏之強自此始奈何又嘉之

二年冬十月不雨三年春夏不雨六月乃雨傳曰不書

旱不爲災。非也。三時不雨。猶不爲災乎。不災何書。
四年。夏。許男新臣卒。傳曰。許穆公卒于師。葬之以侯禮。
非也。是時諸侯從桓公伐楚。侵蔡。蔡近許。許男病歸。
而卒于國也。何以知之。凡諸侯卒于外。必書地。宣九
年。晉侯卒于扈。成十三年。曹伯廬卒于師。襄十八年。
曹伯負芻卒于師。二十六年。許男甯卒于師。昭二十
三年。蔡侯東國卒于楚。定四年。杞伯成卒于會。皆書
地。許男不地。故卒于其國也。傳又曰。凡死王事。加二
等。于是有以袞斂。亦非也。春秋諸侯焉知王事。用禮
焉知等死。內死外。總之。僭而已矣。

五年春晉侯殺其世子申生傳曰晉來告非也告書不告無書爲史臣例則可爲經義則不可申生之死自縊也告則謂世子自縊縊而曰殺仲尼閔實之義非所告也獻公無道嬖庶釀亂豈爲告而書與

夏公孫茲如牟傳曰娶焉非也大夫娶未有書者

秋八月諸侯盟于首止傳曰謀寧周非也是時惠王欲易太子太子不得于王而與諸侯盟是脅父也諸侯無王命私盟太子是要君也春秋人倫之至豈以要脅君父爲寧乎與稱鬻拳愛君同謬

冬晉人執虞公傳稱晉之伐虢也圍上陽問于卜偃偃

據童謠知虢亡在九十月之交凡傳所載歌謠繇
辭窮奇極怪皆脩飾爲之

傳稱虞公以道假晉宮之奇諫不聽以族行曰虞不臘
矣按歲終獵取禽獸祭先祖五祀曰臘夏曰清祀殷
曰嘉平周曰蜡秦曰臘左丘明先秦宮之奇又先丘
明安得預稱秦制其爲後人語可知

六年夏諸侯伐鄭圍新城傳曰鄭所以不時城非也夫
伐鄭以首止逃盟非以不時城也地名新城非城新
築也伐鄭以夏非必城作于此時宋亦有新城文公
十四年爲新城之會豈亦不時城邪

春秋七月禘于太廟用致夫人傳謂致哀姜主于廟非也
哀姜薨七年矣豈至是始祔不稱氏與謚而稱夫人
卽公夫人始歸而廟見也吾聞以祭而廟見者未聞
因廟見而祭者也魯禘非禮七月禘非時傳不達
九年秋七月乙酉伯姬卒伯姬未聞適人而書卒其故
不可考傳不及

十年晉世子見神于狐突此因晉惠公將有韓之敗而
附會之

十一年周襄王使內史過賜晉惠公命受王情史過知
其不長世此本子貢料魯定公執玉事而演之

王子帶召戎伐京師王討子帶子帶奔齊齊桓公不能正其罪又爲之請入居齊六年歸而復有狄后之亂不書傳不言其義一切以不告爲例可乎

十四年春諸侯城緣陵傳曰遷杞不書其人有闕也經有闕而傳不知何稱素臣或曰舊史闕也史闕遂書諸侯凡書諸侯者皆以史闕與

六月季姬及鄆子遇于防使鄆子來朝傳曰鄆季姬來寧公以鄆子不朝怒季姬遇于防使朝非也夫季姬旣爲鄆夫人則宜書鄆季姬季姬旣歸鄆明年九月不宜又書季姬歸鄆傳言妄也公穀謂季姬與鄆子

謀于防使來請已胡安國謂僖公愛女使自擇配是也孰謂立明不如公穀乎

十五年傳稱秦穆公將伐晉使卜徒父筮卦遇蠱占知必勝遂虜晉惠公于韓晉獻公嫁伯姬于秦使史蘇筮遇歸妹之睽并懷公死高梁事皆見于繇凡傳所載繇辭類漢焦贛易林占與經不合著策老變亦後世筮家之法不見于經世儒據左解易正墮其雲霧中耳

十六年六鷁退飛過宋都傳曰風非也風則凡鳥皆退何獨六鷁書誌異也

冬十一月乙卯鄭文公殺其世子華不書傳不言其故
按七年甯母之會華背君父賣國當誅故不書傳不
及豈亦以不告邪

衛旱卜有事于山川不吉甯速曰周饑克殷而年豐請
伐邢師出遂雨豈其然乎此因衛將滅邢附會之
二十二年秦晉遷陸渾之戎于伊川以逼王室經不書
傳不言其故而稱平王初年辛有適伊川見被髮祭
于野者知百年後有戎是舍明法而譚隱怪也

二十三年冬十一月杞子卒傳曰書子杞夷非也夫杞
神禹之裔始封陳畱雍丘何謂之夷豈東遷近徐淮

遂變先代之舊乎。必不然矣。又曰。不書名。未同盟。尤非也。諸侯不同盟而卒名者。不可勝數。旣告卒。焉得不通名。不同盟不告名。于義何居。有之。亦衰世之禮。春秋不由也。

二十四年。王以狄人伐鄭。富辰諫王。引詩小雅常棣。謂召穆公思周德之不類。而作是詩。非也。按詩序。天保以上。皆文武之雅。周公相成王。致太平。作禮樂。常棣其燕兄弟之樂歌也。召穆公相宣王。當周末。詩宜次江漢常武間。焉得與天保采薇同什。傳惑于周公殺管蔡之說。而國語又謂爲公作。無卓識可知。丘明而

若此與

鄭殺子華之弟子臧是九年內殺二子也不書傳不言其故初子華誅子臧奔宋是同甯母之謀者有罪當誅子華不書故子臧亦不書傳謂其好聚鵠冠不衷自災非也一冠何遂殺身而君子尤之

二十五年宋殺其大夫無傳殺大夫非無故何以無傳坐不知耳

晉重耳納襄王誅叔帶王予之陽樊溫原欒茅之田不書非以不告可知傳不及

二十六年齊人侵我北鄙傳稱魯使展喜犒齊師受命

于展禽辭稱周公太公此老生常譚師何遂得寢齊
知魯有備非以辭耳

二十七年春杞子來朝傳曰用夷禮故曰子非也杞聖
王之後以其東遷遂謂之夷則齊魯不在東海之濱
邪凡傳云用夷禮則貶之之說皆非也豈有中諸侯
而顧用夷禮者與

傳稱子犯治晉始入教民三年欲用之曰民未知義于
是乎出定襄王民未知信于是乎伐原以示之信民
未知禮于是乎大蒐以示之禮然後用之出穀戍釋
宋圍一戰而霸文之教此言非也重耳以魯僖公二

十四年反國。二十八年救宋。與楚戰于城濮。僅僦五載間。補葺枝梧。朝不及夕。孔子謂善人教民七年。僅可卽戎子犯之教。抑何速化也。夫納王非教民之事。伐原非肄信之舉。重耳殘忍刻薄。焉知禮義信。聽臣訟以囚君。而假定王以明義。攜曹衛以間楚。而借伐原以市信。要會盟以召王。而託大蒐以習禮。所謂不能三年而察總功者也。子云上好禮義。信天下。襁負其子至。豈僅博一戰之利。道聽塗說。以獎霸功。曾丘明而爲此言與。

楚子玉治兵于蔿。孫叔敖父蔿賈尚幼。料其必敗。此因

明年子王死于城濮附會之傳欲屬文辭每事撰先
兆爲照應聯絡經義無涉

二十八年四月晉敗楚師于城濮傳稱晉侯夢與楚子
搏楚子伏已而盥其腦子犯占謂楚伏罪晉彘之子
王爲瓊弁玉纓夢河神求不與遂及禍皆迂誕無稽
五月晉盟諸侯于踐土傳稱王來會踐土享重耳醴命
爲侯伯錫弓矢車服秬鬯虎賁經皆不書傳不言其
義夫使春秋而獎晉則此類無不書者矣不書則仲
尼之待晉可知而傳過爲揚詡非也

踐土之會王在不書諱也諸侯朝王不書晉召王朝故

不書也。書魯朝以君舉書非以朝也。春秋之義了然傳皆貿貿爾。

冬天王狩于河陽。傳謂爲明德非也。重耳何德而春秋明之以臣召君。猶謂之德。豈丘明而悖謬若此與。三十一年衛遷于帝丘。傳稱衛成公夢康叔曰。相奪予享。成公命祀相。以帝丘本顓頊之墟。夏后相之祖。故附會之。奪享似沙門因果語。何當解經。

三十二年晉侯重耳卒。傳稱柩出絳。有聲如牛。卜偃使大夫拜曰。君命將有西師。過擊之必大捷。此因明年敗秦師于殽。附會之而誕罔尤甚。

三十三年狄侵齊傳曰因晉喪非也中原無歲不苦狄重耳在而狄滅衛其亦晉喪乎

文公

凡三十條

元年春天王使叔服來會葬傳稱公孫敖聞叔服能相人見其二子叔服曰穀也食子難也收子此爲八年公孫敖奔莒死于外附會之

二年夏六月公孫敖會宋公陳侯鄭伯晉士穀盟于垂隴傳曰書士穀堪其事非也大夫書名常耳是役也伐衛士穀爲將故名豈爲堪其事乎

丁丑作僖公主傳曰書不時非也是年冬大衿將躋僖

公于閔公上別作主書逆祀也。僖公葬已十月。非今始爲主。何謂不時。

秋八月丁卯。大事于太廟。躋僖公。傳曰。禮無不順。宋祖帝乙。鄭祖厲王。猶上祖也。是以魯頌曰。春秋匪解。享祀不忒。皇皇后帝。皇祖后稷。君子曰。禮謂其后稷親而先帝。非也。禮諸侯不敢祖天子。大夫不敢祖諸侯。公廟設于私家。由三桓始耳。自成王以王。禮祀周公。其後嗣郊天。禘祖夫子。傷之。故脩春秋。世儒不達春秋之義。以宋郊爲天子之事。守本傳祖帝乙之意。宋後殷而鄭非後周也。并以祖厲王爲上祖。世遂謂諸

侯大夫都家皆有祖王廟。若是則魯郊禘非僭而周公不爲衰矣。魯頌誇誕季孫行父史克從與爲之夫子刪魯風存魯頌卽詩亡之意非以魯頌爲有禮也。諸侯祀天祖天子至亡等也而以先尊後親爲禮會。是丘明而謬若此與。

冬晉人宋人陳人鄭人伐秦。傳曰卿不書爲穆公故尊秦。謂之崇德非也。德雖三五春秋不崇何也。春秋非頌德之書其何有于秦穆卿大夫書人多矣何獨此爲尊秦。

公子遂如齊納幣。傳謂君卽位脩婚姻娶元妃以奉粢

盛謂之孝非也。夫君娶誰不納幣者而不盡書。豈皆爲不孝乎。僖公以前年十二月薨。猶在兩期之初。而議婚非禮也。書以誌急欲。

三年夏五月。王子虎卒。傳以弔如同盟爲禮非也。同盟赴名。傳例耳。非經之義。翟泉之盟。謂王人卽子虎亦傳臆度耳。非經有明據也。王官與諸侯同盟者多矣。何獨卒一子虎。其魯之私交與弔則書。非爲同盟也。夏。秦人伐晉。傳稱晉人不出。秦取王官。封穀尸而還。遂霸西戎。以用孟明。故非也。夫孟明三敗博一勝。得不補亡。而是役也。晉堅壁清野。秦師空還。何足以雪三

敗之恥。穆公稱霸。在定夷吾納重耳之時。不待取王官之後矣。豈孟明之功與。

秋雨螽于宋。傳曰。墜而死。非也。死不爲災。則不書。謂螽飛集如雨之多爾。

四年。逆婦姜于齊。傳曰。卿不行。貴聘而賤逆。非也。與前書納幣。皆直公之急欲耳。

七年。公會諸侯。晉大夫盟于扈。傳曰。公後至。故不敘國與人。避不敏。非也。後至不敏。世儒尊霸之例。春秋賤霸。羞盟。豈以後至爲諱。書諸侯。晉大夫。惡晉以臣盟君也。豈爲其避不敏乎。

按傳晉襄公卒在六年秋秦康公送子雍令狐之戰在七年夏是時趙盾始立靈公豈晉經年無君乎既稱先蔑如秦逆子雍且至又稱先蔑將下軍敗秦師豈晉有二先蔑乎先蔑既敗秦又奔秦皆不可曉

八年春晉使解揚歸衛匡戚之田與所取封公壻池之地皆還之趙盾新政以此睦諸侯告可知而經不書小惠近名不足錄也傳爲趙盾揚勵耳

乙酉公子遂會雒戎于暴傳曰書公子遂珍之非也受盟于戎何珍之有慶父出奔亦書公子豈賊臣亦珍之邪

宋人殺其大夫司馬。宋司城來奔。傳曰：書皆以官，皆貴之，非也。宋昭公欲盡去羣公子，而以子邠爲司馬。昭公嫡祖母襄夫人率戴氏之族殺昭公之黨。大夫司馬皆非端人，司城者蕩意諸也。出奔未幾而求復，遂及于禍，亦不知止者。此二子烏足責乎？

九年，楚人伐鄭。公子遂會晉人、宋人、衛人救鄭。傳曰：緩不及楚師，故諸卿不書名，以懲不恪，非也。春秋書人多矣，無此例。

十年秋七月，及蘇子盟于女栗。傳曰：頃王立，故也。春秋之事，同盟則爲君，天子立而求諸侯盟，春秋傷之，傳

若以爲當然爾

楚范巫審似知楚成王子王宜申皆將強死其後成王果遇弑子王死城濮宜申謀弑穆王誅巫言禍福有之未必中卽中于經奚取而傳亟稱之多此類

十二年正月郕伯來奔傳謂郕世子以邑夫鍾郕邾圭奔魯公以諸侯禮逆之故書伯非也此郕君避難自奔魯耳豈有子叛父以土地獻他人仲尼反進稱伯者乎

子叔姬卒傳曰不言杞絕也書叔姬言非女也然則何以稱子從夫之義傳不備

十四年春。頃王崩。不書。傳謂王室有王孫蘇之難。不告。故不書。懲不敬也。夫天子崩。豈待告然後書。不告不書。是喪亦不會也。如是則魯自不敬。將誰懲。且所謂懲者。其舊史懲之乎。其仲尼懲之乎。舊史懲之。不可以言春秋。仲尼懲之。當時告不告。仲尼不知也。天子崩。不下告。不爲不敬。今不以諸侯不奔喪爲不敬。而以王不告喪爲不敬。倒也。則何以不書。周不告。魯不會。故史無書。經亦無書。而魯之不敬可知。懲不敬。懲魯可也。

秋七月。有星孛入于北斗。傳稱周內史叔服占曰。不出

七年宋齊晉之君皆將死此爲宋弑昭公齊弑懿公
晉弑靈公而附會之也

十五年三月宋司馬華孫來盟傳曰貴之非也按華孫
華督之孫督弑君而其孫猶爲司馬蓋昭公之黨也
國亂自託于魯仲尼之不貴此等人明矣

夏曹伯來朝傳曰諸侯五年再相朝以脩王命古之制
非也夫朝者臣見君也諸侯五年一朝天子無諸侯
自相朝之禮五霸強僭始朝同列故小國來皆書朝
史文也經因之直也後儒遷就其說遂謂諸侯世相
朝此在齊魯比鄰則可若徧千八百國日亦不足而

況五年而再乎傳爲晉朝諸侯地不知其謬矣

單伯至自齊傳曰貴之非也按單伯奉王命爲魯請叔姬于齊齊人執之以晉故然後得釋至辱也而反以爲貴豈不謬與

冬十有一月諸侯盟于扈傳曰諸侯會公不與不書諱君惡非也夫五霸假會盟要脅諸侯春秋未嘗以盟爲善豈以不盟爲惡甚違仲尼之意

齊侯侵我西鄙遂伐曹傳曰討其朝魯齊討有禮謂之反天非也伐曹固齊之罪朝魯亦非曹之禮

十六年冬宋人弑其君杵臼按傳襄夫人使昭公田孟

諸將殺之。公知之。載其寶以行。蕩意諸請公出奔。公曰。不能于其大。天祖母人誰納我。盡以其寶賜左右而死。非也。蓋是時。昭公欲逃不克。賂左右而不得免耳。又謂襄夫人使蕩意諸去。公意諸對曰。臣之而逃其難。若後君何。遂死之。亦非也。意諸八年奔魯。十一年復求歸。歸六年而難作。鄙夫患失死。非其志。不得已耳。又曰。書宋人弑其君杵臼。君無道。尤非也。春秋明大義。雖以桀紂之虐。湯武不能掩放殺。而況其餘乎。君弑矣。猶數其罪以謝亂賊。春秋無是也。然則何以名其君。蓋事至此之謂不諱。惟明惟允。惟審惟直。

以告諸天下後世而已。且君而若夫已氏者，何可以弗別也？名以別之，不獨名一杵臼耳。

十七年冬，公子遂如齊。傳稱遂歸言齊君語，偷將死，因明年商人遇弑，附會之。

十八年春，齊懿公將伐魯，有疾，醫言其將死。魯聞其來伐，使楚丘卜。惠伯令龜。楚丘知公與惠伯亦將死，此因懿公遇弑，魯文公薨，襄仲殺惠伯，附會之。

宣公

凡二十六條

二年秋，晉趙盾弑其君夷臯。傳稱孔子曰：「趙盾，古之良大夫，爲法受惡，非也。夫弑君何等事，豈盾不弑君？妄。」

加之其必不然矣。傳言靈公無道，趙盾驟諫，至盾所以出奔，與趙穿弑君之故，紕漏不詳。第云趙穿攻靈公于桃園，宣子未出山，反竟不言宣子何以出，穿攻公何以正當，宣子出時聞君死，卽反反不討賊，其何辭以解？故書趙盾弑君，實錄也。不然，弑逆之惡，可以誣良大夫乎？旣書弑君矣，又稱良大夫，是非不譎，張乎至謂趙竟乃免，則愈小人之腹矣。因啓世儒責備之例，君子無求備，豈春秋而獨不然乎？餘詳解。

三年晉伐鄭及鄭，鄭及晉平，不書。傳不言其故，蓋是時晉趙盾弑君，專國，晉政卑矣。楚莊王賢而脩政，故楚

事詳晉事畧傳不達

楚子伐陸渾之戎傳稱王孫滿對楚子問鼎之辭非也過周郊問九鼎人情好異耳援天命國祚以美文辭而世儒遂蔽楚子之罪以附合尊周攘夷之例未見其允也陸渾害王室爲晉私人諸侯不敢問楚子此舉無功卽無罪王使人來勞蓋亦喜之故其書法甚堂堂傳不與其功而反加之罪蒙戎者無罪而伐戎者罪之豈至當之論乎

傳謂鄭穆公母燕姑夢蘭生穆公事或有之至謂穆公有疾刈蘭而公遂卒則怪誕甚矣此因穆公名蘭附

會之

四年六月乙酉鄭公子歸生弑其君夷傳曰凡弑稱君君無道也稱臣臣之罪非也果若此其君無道其臣遂無罪乎顧天下安得有道之君弑之甚矣其說之謬也

鄭靈公遇弑國人立子良子良辭立子堅是爲襄公春秋諸侯之子弟讓國者多矣鄭子良宋子魚曹子臧吳季扎楚子西衛子郢之類皆不書何也五霸詐力成風父子兄弟相傾智者視其國如巖牆然其讓也皆利害私情一身完名而禍延累世春秋不取也傳

不及

七年夏公會齊侯伐萊傳曰不與謀凡師出與謀曰及不與謀曰會非也經書會多矣同伐同盟皆稱會是役也公夏往秋歸焉得不與謀凡傳例無端類此

冬公會晉侯宋公衛侯鄭伯于黑壤傳謂晉人以公久不朝不與盟故諱不書盟非也不盟何足諱不朝不盟未有得免者晉人止公責賂乃得盟故諱也傳甚貴盟未知春秋本賤盟也

八年晉獲秦謀殺諸絳市六日而甦非也殺人而尸諸市離其身首矣六日復蘇理所必無

冬十月己丑葬我小君敬嬴。雨不克葬。庚寅日中而克葬。傳謂卜葬先遠日。辟不懷也。雨不克葬。禮也。非也。傳以不葬爲懷親。夫送死大事。不夙戒而因雨廢。其慢甚矣。謂爲懷親。則無雨克葬者。皆爲忘親乎。禮。雨霑衣失容廢者。如諸侯朝見之類。倉卒失備。葬卜日。皆備矣。何有于雨。若日可易。何必卜。禮不違卜。筮不犯日月。敬嬴庚寅日中。定公戊午日昃。違卜。皆慢也。何得謂禮。禮疑而筮則弗非也。日而衍事則踐之。城平陽。傳曰。書時。非也。是時冬十月。夏正八月耳。城焉得時。前此六年。蚤七年大旱。是年葬敬嬴。旱無麻。用

葛緇歲儉可知而城焉得時

九年陳殺其大夫洩冶傳謂孔子引詩云民之多辟勿自立辟譏之非也陳靈公君臣宣淫洩冶進諫孔子何以致譏與譏齊鮑牽同謬皆非孔子之言

冬楚子伐鄭晉卻缺帥師救鄭傳稱鄭伯敗楚師于柳勢經不書是春秋未嘗專重晉鄭而黜楚也傳知有晉而已

十年夏四月己巳齊侯元卒齊崔氏出奔衛傳曰崔杼有寵于惠公高國畏其偪公卒而逐之非也按魯成公十七年齊靈公始命崔杼爲大夫是後此二十五

年也。魯襄公二十五年。崔杼弑君。後此五十年也。計齊惠公時。崔杼始生。遂已擅君寵。逼高國乎。崔氏世卿。何止一杼。而傳紕漏如此。又曰。書崔氏以族來告。亦非也。春秋大夫出奔多矣。如以告。豈崔子獨氏。他人皆名乎。告大夫無不名者。書崔氏。挈族行耳。崔氏已去齊。崔杼不知以何年反。傳亦不詳。

楚子伐鄭。傳曰。晉士會救鄭。逐楚師于潁北。諸侯之師戍鄭。此晉人之功。不書。是春秋未嘗專予晉也。

鄭子家卒。鄭人討靈公之亂。斲子家之棺。逐其族。子家卽歸生也。四年。書鄭歸生弑君。此國人公論。而傳謂

事由于公故傳譁張難信信經而已

十一年楚子納公孫寧儀行父于陳傳謂有禮非也二
子淫惡從史以亡君既不與徵舒同誅又從而納之
何謂有禮

十四年公孫歸父會齊侯于穀傳謂歸父見齊晏桓子
而稱魯樂洛高固知歸父將亡此因魯將逐歸父附
會之

十五年晉滅赤狄潞氏傳稱晉侯復立黎侯而還黎侯
卽詩所爲賦旄丘者也不書傳不言其故

夏秦人伐晉傳稱晉魏顆敗秦師于輔氏獲秦武士杜

回初顓父讎。病且死。欲以所愛妻殉。顓不從。及輔氏之戰。妻父化爲鬼物。結草于路。以亢杜回。遂獲之夜。見夢于顓。此沙門因果語。非仲尼不語之教。

秋。仲孫蔑會齊高固于無婁。傳不詳其事。按此大夫與大夫會之始。烏可無傳。

冬。蠃生飢。傳曰。幸之非也。春秋書飢三。皆窘急乃書。反曰。幸之。竊所未解。

晉使趙同獻狄俘于周。不敬。剽康公曰。不及十年。必有大咎。天奪之鬼矣。爲魯成公八年。晉殺趙同。附會之。十六年夏。成周宣榭火。傳曰。人失曰火。天火曰災。非也。

焚卽是災何天人之異

十七年晉與諸侯爲斷道之會。傳稱卻克以齊婦一笑之恨執齊使。苗賁皇爲說于晉侯免之。語與哀公十二年子貢爲衛侯說吳太宰嚭語相似。脩辭常套也。冬公弟叔肸卒。傳曰公母弟也。凡太子之母弟。公在曰公子。不在曰弟。凡稱弟皆母弟。非也。按禮莫尊于父。同母得稱弟。而異母不得稱弟。是重母反輕父也。父死禮亦稱公子。則是無此例也。

春秋直解卷十四終